

大正藏第 08 册 No. 0253

般若波罗蜜多心经 1 卷

No. 253 [Nos. 250-252, 254, 255, 257]

般若波罗蜜多心经

罽宾国三藏般若共利言等译

如是我闻：

一时佛在王舍城耆闍崛山中，与大比丘众及菩萨众俱。时佛世尊即入三昧，名广大甚深。

尔时众中有菩萨摩訶萨，名观自在。行深般若波罗蜜多时，照见五蕴皆空，离诸苦厄。实时舍利弗承佛威力，合掌恭敬白观自在菩萨摩訶萨言：「善男子！若有欲学甚深般若波罗蜜多行者，云何修行？」如是问已。

尔时观自在菩萨摩訶萨告具寿舍利弗言：「舍利子！若善男子、善女人行甚深般若波罗蜜多行时，应观五蕴性空。舍利子！色不异空，空不异色。色即是空，空即是色。受、想、行、识亦复如是。舍利子！是诸法空相，不生不灭、不垢不净、不增不减。是故空中无色，无受、想、行、识，无眼、耳、鼻、舌、身、意，无色、声、香、味、触、法，无眼界乃至无意识界。无无明亦无无明尽，乃至无老死亦无老死尽。无苦、集、灭、道，无智亦无得。以无所得故，菩提萨埵依般若波罗蜜多故心无罣碍。无罣碍故，无有恐怖，远离颠倒梦想，究竟涅槃。三世诸佛依般若波罗蜜多故，得阿耨多罗三藐三菩提。故知般若波罗蜜多是大神呪，是大明呪，是无上呪，是无等等呪。能除一切苦，真实不虚。故说般若波罗蜜多呪。」

即说呪曰：

「鞞鞞 鞞鞞 波罗鞞鞞 波罗僧鞞鞞 菩提 娑(苏訖反)婆訶

「如是，舍利弗！诸菩萨摩訶萨于甚深般若波罗蜜多行，应如是行。」如是说已。

实时，世尊从广大甚深三摩地起，赞观自在菩萨摩訶萨言：「善哉，善哉！善男子！如是，如是！如汝所说。甚深般若波罗蜜多行，应如是行。如是行时，一切如来皆悉随喜。」

尔时世尊说是语已，具寿舍利弗大喜充遍，观自在菩萨摩訶萨亦大欢喜。时彼众会天、人、阿修罗、干闥婆等，闻佛所说，皆大欢喜，信受奉行。

## 般若波罗蜜多心经

---

【经文信息】大正藏第 08 册 No. 0253 般若波罗蜜多心经

【版本记录】CBETA 电子佛典 Rev. 1.12 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】庄德明大德提供，CBETA 自行扫描辨识，CBETA 提供新式标点，其他

【其他事项】本数据库可自由免费流通，详细内容请参阅【中华电子佛典协会数据库版权宣告】

---